

De Kwakel

CV de Moerebuuk
Jaorgank 60



Prins Noud I Prinses Pleun



Gratis zitplaatse inne kirk

Blz. 12

Pieter en zien kippepuuetjes

Blz. 10

De slechtste chauffeur van Èll

Blz. 13

Gróndj bie Sjaokes opgehuuegdj

Blz. 13

Dao zitj ein luchtje aan

Blz. 7



Jeugdprins Koen
Jeugdprinses Miek

Vastelaovendj 2025

De Kwakel



Proclamatie



CV DE MOEREBUUK
Jaorgank 60



Ich prins Noud de 1e , 74e prins van de Moerebuuk.

In 1992, 3x11 jaor geleje, gebore op noewjaarsdaag in Kelpen-Oler. Tot meug aan toe de brök op en aaf gefietsj want in mien hert bèn ich altied 'ne Moeëreboek gewaesj.

Zoon van aodprins Sé en aodprinses Elly van de Kuijeldreijers en breurke van aodprins Luuk dea precies 11 jaor geleje in ós Moerelandj veurop ging.

Gelökkig al 'ne hieële tied woënachtig in Èll, woë ich same woëen mèt mien prinses Pleun van Vleishouwers. Sins kort hóbbe wea ós eige stekkie aan de Jasmijnstraot, waat noe ómgeduipjt weurtj tot de Prinsestraot. Pleun is waal gebore en getoge in Èll, mer de einige in de familie Vleishouwers mèt 'n Èller accent. Beide zeen wae vastelaovesveerders in hert en nere, die moeilik heives kónne gaon. Biegestange door aodprinse Luuk en Rick, aodprinsesse Robin en Joreth en Cauven en Dorthe.

Vereinigingslaeve en ciefers staon veur mich centraal. Zoëe bèn ich de nummer 10 van 't vlaggenschip van DFO '20: 't Derdje, goeëj ich gaer 'n pielke bie DC 9 II, 2 kieër per jaor te vinje in 't Brook mèt Stichting Spook, al 5 jaor trotse veurzitter van 't Kindervakantiewerk Ell en dit jaor veur de 17e kieër actief oppe Bóntje Aovendj mèt "3x Niks". Zeldzame fan van 16-voudig landskampioen en de sjoeëste club van Nederlandj: mien Feyenoord. Daonaeve gaon ich gaer mèt mien prinses op vakantie. Aaf en toe wieët wèg, mer zeker eine kieër per jaor snowbaorden in Oeësteriek. De gemeine deiler in al dees dinger is ein lekker kaod glaeske beer, waat wae allebei neet gauw euverslaon. Óm dit allemaol te kónne bekostige wirk ich onnog. 40 van de 52 waeke op 'n jaor rie ich nao 't stedje van lol en plezeer en staon ich veur de klas als wiskunde docent.

Bie de gratie van Groeëtvorst Jan, Groeëtvorst Henri, Vorst Steef en de Raod van Elf verklaor ich 't volgendje:

- Det ich mèt mien prinses Pleun, adjudante Luuk, Rick, Cauven en heur dames Robin, Joreth en Dorthe d'r alles aan gaon doon óm van deze vastelaovendj ein geweldjig fieëst te make!
- Det wae dit samen doon mèt 't jeugprinsenpaar, heur adjudante en de jeugdraod
- Hiebie raekene wae nateurlik ouch op de men en dames van de Raod van Elf.
- Det wae, boete 'ne houp vleisboeket, ouch moge gaon geniete van live muziek van de Ellenthaler en de Kaolderband.
- Det "3x Niks" dit jaor neet mèt duit in de optocht bie de klein groepe, mer veur de ieërste pries geit bie de einzel gengers. Hé Gert
- Det Spieje alweer de 3e prinses in de groep heet, dus die gaon zeker weer gaas gaeve dees daag.
- Det mien kammereuj van de Vervaelers, óndanks det ich neet officieel bie heur in de groep zit, ouch neet aan de kantj blieve staon.
- Det d'r mer ein dink is woëe wae Moeërebuuk veur laeve, vastelaovendj is alles gaeve!

Det ich dees daag zal regere in de Orde van de Wortel
En dit alles onger mien motto:

**'t Is geine hoeëgere wiskunde mieër,
alles gaeve, kieër op kieër!!**





Leef Moeërebuuk,

Nao de kirmès startj veur ós altied 't dartseizoen mèt 'ne beker wèdstried. Nao 'n paar daag stappe hóbbe wae dao altied hièel veul zin in. As se den drie kwarter veur vertrèk hoeëg bezeuk kriegs mèt de vraag óm de 74ste prins te waere, geluif mich, den raaks se hieëlemaal niks mieër.

Ich zoot woonsdigaovendj lekker relax oppe bank te wachten veur wae ginge darte toen de bel ging. In ièeste instantie dacht ich det Pleun heure sleutel weer ins vergaete waas, mer de graasj deur waas gewuuen ope. Ich haaj geine zin óm miene sleutel te zeuke, dus keek ich oppe camera weem d'r veur de deur sting. Ich kreeg 't drek werm en mien hert ging tekieër, want dao sting Steef. Ich wist drek woeë d'r veur kwoom. Einmaal binne woeëj d'r ouch nog ièest 't hoes bekieke en daonao kwoom den echt DE vraag. Pleun waas neet thoes, dus wae sproke aaf det ich veur 't weekend get leet wete. Wie Steef wèg waas wis ich neet wie ich 't haaj. Ich waas blie, verrasj en ich veuldje ouch 'ne bepaoldje drök. Pleun kwoom vier minute later binne, die waas zoeë enthousiast det d'r geliek 'n duimpje omhoeëg ging richting Steef.

Vanaaf det moment koste we neet wachte óm hie te staon. 't Vraoge van mien adjudante waas nog un hieël opgave. De zwangerschap van mien sjoeënzus Robin, de zwangerschapsaankondiging van Joreth en de geboorte van baby Emma op 't moment det wae ze woeëje gaon vraoge mook 't extra spannendj, mer ouch hieël speciaal. Óndanks alles bèn ich blie en trots det wea hie noe mè z'n alle staon. Klaor óm van deze vastelaovendj mèt uch ein fantastisch fieëst te maken. Genietj d'r van en dinkjt d'raan: alles geave!

Prins Noud I

P.S. Dae bekerwèdstried hóbbe wae mèt 7-1 gewónne en ich waas neet degene dae ziene wedstried verloor ;)



Hover huwelik

Jac en Frank van Hover zeen fervente wanjelieërs. Zoeë lepe ze aafgeloupe zomer 't Kloosterpad. Des 'n route door Braobantj, die de breurs in etappes van 't eine nao 't angere kloeëster bracht. Jac bedacht óm ter aafsloting ein get luxer hotel te booke, mèt ein lekker diner. Det haje ze nao al die kilomaeters loupe waal verdeendj. Wie ze nao eine lange, heite daag wanjele bie 't hotel aankwome, versjoot de receptionist dudelik.

Hae haaj al völ veurbie zeen kómme, mer dees twieë aafgepeigerdje men mèt heur moddersjoon, die zich melddje veur de bruidsuite, det waas waal 't toppuntj!

't Vlaggesjeep

Yvette, jaore gevoetbaldj bie 't vreugere RKESV, waas op de receptie van aod Prins Bus. De veterane kwomé 't podium op en Yvette vroeg zich helop aaf of de postbode dae op 't podium sting ouch voetbaltj. "Nae" zeet Pleun, "dae is vlagger." Yvette dacht efkes nao en vroeg 'n paar seconde later: "Is det 'tzelfde as eine grensrechter?"

Bo zoj zègge: "die heet toete nog balle verstandj van voetbal!"



Króm tieëne of króm zin?

Roan (9 jaor) haaj veur de KVV-waek noew sjoon gekrege. Drek nao de KVV-waek zagt d'r tege pap en mam: "Mien sjoon zeen noe al te klein!" Martijn en Angelle grauweldje get en gelofte hum neet, "Det kan écht neet, die zeen net ein waek aod". Abe (8 jaor) knoterdje: "Ich gaon echt neet op die sjoon nao KVV, die zeen mich te klein." Nao de KVV-waek huurdje Marjon niks mieër euver de sjoon. Good 10 waeke later zaag Roan inins det Abe dezelfdje sjoon haaj. Woeë ze precies verwisseldj zeen is neet dudelik, mer wat zal Roan króm tieëne hóbbe gadj.



Vae weense uch
'ne schoeëne vastelaovendj

DURFTJ TE DROUME
www.viadal.nl 0495-743111
MAKELAARDIJ • FINANCIËEL ADVIES • VERZEKERINGEN



MIJN BUURT MIJN SPAR

SPAR DERKSEN
SEBASTIAANSTRAAT 12
6011 RE ELL 0495-551285




Bart van den kerkhof-maatwerk
Keukens & Interieur

0620874967
info@bvdk-maatwerk.nl
www.bvdk-maatwerk.nl
Eil, Limburg, Nederland

Zoeë jónk asse dich veuls

Jeroen en Claudia gaon mèt de vrinjegroep op kirmis zaoterdig stappe bie de Bachelorclub. Tenslotte bèsse zoeë jónk asse dich veuls. Later oppe aovendj geit Claudia nao de wc. Dao steit ein aantal maedjes te wachte. Claudia sluitj achter inne rie aan en veultj zich op heur gemaak. Totdet ein van die maedjes aan Claudia vreugtj: "Bès dich neet de mooder van Len?" Claudia löptj trök nao heur vrinj en zeet: "Kóm wèg hie, wae gaon nao de Prairie."



Det is gein speulgood

Ónger de senioremiddig speuldje Raf Benders (3 jaor) mèt de knop vanne deur inne zaal. Prachtig! As hae oppe knop duutj, geit de deur vanzelf ope. Det is sjiek! Papa Tim lègtj 'm dudelijk oet det dae knop gein speulgood is: "Stop dao ins mèt Raf, want anders kriege de minse 't kaod. En as aoj minse 't kaod höbbe, den gaon ze doeëd. En den is d'r volgendj jaor geine senioremiddig mieër!"



WAAT 'N SÖPKE

'T was weer tied veur 't poetse vanne badkamer. En grondig as Maud te wèrk geit, mót ouch de WC-börstel zoeë noe en den gereinigdj waere. Maud meuktj den 'n söpke van allerlei sjoeënmaakmiddele inne WC-pot en lieëtj de börstel dao ein tiedje in weike. Juust jao, mèt de steel omhoeëg inne pot. Joost heet det neet inne gate en geit mèt zien vot oppe WC-bril zitte. Noe mót ouch de steel nog effe in 't söpke staon.



TE van den Eertwegh
Tegel & Natuursteenwerken

S
Haarboutique

Pom-pi-dom

Daniëlle haaj water inne kelder, mer heur pómp was kepot. Dus lieëndje ze die van broor Maurice. Ein tiedje later haaj Maurice zelf ouch last van water, dus hae ging nao 't tórp óm zien pómp op te hole. "Wètse waat we doon, we zètte hie de pómp nog effe aan en drinke ós ein tas koffie. Den höbs dich de kelder drueeg en den pak ich 'm mèt nao de Hunnissestraot." Zoeë gezagt, zoeë gedaon. De pómp wèrkdje volop en bie de tweeëdje tas koffie vreugtj Daniëlle inins: "Zèk, haje we neet ouch de slang nao boete mótte lègge?" ... Maurice heet aevogood de pómp mèt heives gepaktj.



Ingewikkeldj

Veur de optocht moste d'r kleijer waere oetgezocht rondjóm 't thema 'oetgebredj'. Veur de dames zelf was det zoeë beklónke. Waat de kinjer aan koste doon, wore ze nog neet gans aan oet. 't Veel Nicole op ins in, det ze bie de HEMA eine hieële, lieëlike, fel roze, gebredje trui haaj gezeen. "Weem duit zien kindj det noe aan?!" Rian veel efkes stil. "Dae höb ich veur ós Fleur gekocht."

Slagerij Ruud & Marleen Heijkers
Hèt adres voor:
koude & warme buffeten en barbecue's compleet

Sebastiaanstraat 19 Eil tel. 0495-551242
www.slagerijheijkers.nl

RE-COLOR
Solutions in renovation

Wisj dj'r al..

- det Pietje 'n böltje op ziene kop heet laote weghole, mèt flink get hechtinge as gevolg;
- det Jeanne Camp 'm toen op ziene kop houwdje;
- det ze meindje det d'r ein spin op Pietje ziene kop zaat.





De Kwakel



Lank is de weeg vanoet Kelve

Jesse Tunissen waas nao 't voetballe in Kelve nog effe blieve hange inne kantien. Wie d'r heives woog gaon, kos d'r nemes bereike óm 'm te kómme hole. Det waas veur Jesse gein probleem, hae leep nao Èll. Wie d'r de brök aafleep, stoptje eine auto. Ein van zien vrinj hing oet 't raam en zagt: "Hey Jesse, wae gaon nao Heldje, dao is ein dik fieëst. Kom, gank mèt!" Det klónk waal good, dus Jesse staptje inne auto. Óngerweges bedacht zich eine: "Óm binne te kómme hóbse waal ein kaertje nuuedig." D'r waerdje online gekeke of d'r nog kaertjes te kriege wore, mer helaas, 't waas stief oetverkocht. Toen hóbbe ze Jesse ane stopleechte mer gauw weer oet de auto gelaote. Móst d'r detzelfdje stök nog ins loupe!



Broederliefde

Trök van zien avontuur in Australië, waas Bram Coumans zien lange haar eigelik waal 'n bietje meug. "Ich hób bie Anke ein aafspraak gemaaktj, volgendje waek dónderdig gaon ich nao de kapper" kondigdje hae aan. Op woonsdig ónger 't aete vroeg mam: "Wielaat mósse mörge bie de kapper zeen?" "Óm 10 oor." Broor Stef zaat ouch ane tafel en booj aan: "Den kóns se de auto mètpakke, dae gebroek ich mörge neet..."



Maondj nao de maon

Regelmaotig zeen d'r van die hypes, óm de minse bewustj te make van eine gezónje laevesstijl. Zoeë is d'r 'Stoptober' óm minse te helpe stoppe mèt rouke en 'Dry-January' óm 't noewe jaor zónger alcohol te beginne. Anke Strous deej mèt aan Dry-January. Ze paktje dit hieël bewustj en streng aan. Ouch det eine pilske nao de repetitie vanne fanfaar sloog ze al de ganse maondj euver. Op zien receptie trakteerdje aod Prins Jeroen op ein shotje Kroep-olie. Ein likeurtje inne vorm van motor-olie, ómdet det zoeë sjoen bie zien motto pasdje. Veur de d'r erg in haaj, drónk Anke 't glaeske leeg. Gans de maondj nao de klo.. maon!



Veur eine appel en ein paer
gaotj gae nao
fruitbedrijf Moors
haer.



Sporte maaktj hóngorig

'T waas eine drukke daag bie de fysio, nog geine tied gadj veur ein tas koffie. Nao get eurkes hel wirke waas 't veur Maikel eindelijk tied veur lunch. Hae woeëj net beginne aan zien dik gesmeerdje botterhamme toen d'r 'nne aojere mins binne kwoom. Dae gooje mins most sporte ónger begeleiding, dus Maikel zei: "Ich gaon efkes diene begeleider veur vandaag zeuke, want ich hub net pauze." Maikel bleek neet de enige dae honger haaj, toen d'r trök kwoom stinge er ein aantal minse verbaasdj te kieke en waas dae aojere mins op Maikel ziene botterham aan 't kauwe...

Wisj dj'r al..

- det Emmy get oet heur tas paktje en det d'r toen 'n hampel drankmuntjes oetveele;
- det ze aan pap verteldje det die van de bar in Rooj wore;
- det Ruud dao ieëre ouch dèkker is gewaestj: "wie hètj 't alweer, de Majoeri-bar?"



HOOFDSPONSOR VANNE SPOORWEGE

Gelökkig krieger wae regelmaotig hulp bie 't sjriev van de Kwakel. Minse gaeve den in 't kort get door wat ze hie of dao gehuuerdj, of mètgemaaktj hóbbe. Zoeë óntvinge wae aafgeloupe jaor 't berichtje: "Wisj dj'r al det Bo al jaore 'n NS abonnement betaaltj, t'rwiel ze in Wieërt wirktj en mèt de auto geit!" Op de ieëste Kwakel bie-einkomst waerdje Bo óm details gevraagdj. "Ich hób hieëlemaal gein NS abonnement! Woeërom zeet ze det? Wie kumtj ze dao bie?" De vraogteikens in Bo heur ouge wore oprecht, dus ginge we wiejer. Effe later klinktj 't: "Oh nae! Ich betaal waal ane NS!" Hie haaj dit verhäölke kónne eindige. Mer wie d'r op de twieëdje bie-einkomst nog ins óm gelache waerdje, bekindje Bo: "Och sh*t jao, det mót ich nog steeds opzègge!"



De Kwakel

S-jean-rrell



Joost en ziene collega Luuk oet Swartbrook wore aan 't wèrk gewaesj bie de Prairie, wie ze de daag aafslote aane bar. Eine waas geine en zoeë volgdje versjillendje pilskes. Luuk kós neet mieër heives rieje, dus bleef bie Joost slaope. Same mèt moder Jean lepe ze nao hoes, óm nog 'n lekker tas koffie te drinke. Wie Joost tege Maud ging zègge det t'r thoes waas en det Luuk bleef slaope, haaj Maud 't gezelsjap al binne huuere kómme. "Allemaal good en waal det Luuk blijft, mer dae sjarrel waat t'r bie zich heet dus écht neet!"



Euver Heyste óm

Ins inne zoeëveul tied kómme de vrullie van Spieje bie-ein óm gezellig bie te kletse. Deze kieër haje ze aafgesproke in Neejwieërt bie Peerkesbosch. Op 't aafgesproke tiedstip waas ederein dao, behalve Noortje, die vanoet Ospel móst kómme. Lang wachte, dao haoje ze neet van. Dus waardje d'r gebeldj: "Noortje, woëë blief se?" "Ich staon al zeker 5 minute op uch te wachte, woëë zeetj gae?", waas de reactie van Noortje. "Wae staon oppe parkeerplaats." "Jeh, dao staon ich ouch! Woëë zeetj ge den, ich zeen uch neet." "Jeh, bie Peerkesbosch, drek veuraan." "Det mein se neet," zuchdje Noortje bedremmeldj, "ich meindje det wae bie de Busjop haje aafgesproke!"

Wisj dj'r al..

- det Dick en Miny 60 jaor getrouwdj wore;
- det de hieël straot de vlag boete haaj gehange;
- det Yvette zich aafvroog of Jo en Marij de vlag haaj oetgehangen ómdet Jeroen Kaolder 't hoes oet waas?



versjèt in 't frietvèt



Eine Chaos verzameldje nao de optocht bie Creemers óm eine goje boom te lègge, dus waardje d'r friet gehoojdj. Liesbeth kwoom kieke of ederein waas veurzeen, wie Stef vroog of ze mesjien eine versjèt veur 'm haaj. Gein probleem, Liesbeth leep nao de keuke. Stef haaj de friet al haost op wie Liesbeth trök kwoom mèt 'n bördje mèt twieë krokette. Wie ze Stef get bedinkelik zoog kieke, vroog ze: "of wiewöl wilse d'r?"



mich neet belle

Vanoet de voetbalclub mót ederein 'n aantal "vriewilligersore" biejein doon. Op 'ne zaoterdig wore Cas Camp en Jeroen Cauven ane beurt óm aod papeer op te hole in Grathem. 't Waas dudelik gecommuniceerdj det ze verwachtj waardje, mer de organisator besloot óm toch nog efkes te belle veur de zekerheid. Jeroen noom neet op, dus de voicemail waardje ingesproke: "Ha Cas, dink se d'raan det se aod papeer op mós hole zaoterdig?" Jeroen besloot trök te belle en geliek door te gaeve det hae Jeroen waas en neet Cas. Hae zagt det ze op de huuegdje wore en zaoterdig allebei aanwezig zoje zeen. "Oh oke, det is fijn" zagt de mins oet Grathem, "tot zaoterdig den Cas". Vief minute later waardj Jeroen opnoew gebeldj: "Ha Jeroen, de stuis op de liest óm zaoterdig aod papeer op te hole in Grathem.."



Wat zeen we op dees foto?

- Petra startj 'n wanjelwage oetlieën-service
- Truck-stop de Prairie
- Jónk gelieërdj is aod gedaon



Muziekproducties • Dirigeren • Arrangeren • Componeren •
Producteren • Registreren • Presenteren •
Dialectpop • Artiestenbegeleiding • Projectcombo •
Advies m.b.t. muziekprojecten • 'Studio Linje'

06-55703344 • INFO@FERMATE.NL • WWW.FERMATE.NL





Wisj dj'r al..

- det Lieke zich hèlop aafvroog of Harie vanne Slegter tennistj?
- det Lieke dit echt knap vindtj op de laeftied van Harie
- det Harie inderdaad waekeliks gespotj waerdj mèt 'n sporttas oppe rök
- det Harie neet geit tennisse mer handjboog sjete

Regelmuts

Aafgeloupe zomer stóng de broeloft van Bo en Cas op 't programma, dao huerdj uiteraard ouch ein vriegezellefieest bie. Sofie mosje ónger angere het fieestje veur Bo regele en Micky kreeg de opdracht óm eine sjieke daag veur Cas te organiseren. Wie te verwachte, wore de vrullie ruum op tied mèt alles veurbereide. De men daointege wore get traoger. Sofie haaj Micky al dèkker achter de vodde aan gezaete. De daag veur 't vriegezellefieest van Bo bleek det oetgeraekendj Sofie vergaete waas óm de activiteit te booke. Oeteindelik is 't good gekómme, vrullie...



ALLES VEUR DE LIEFDE

Leon, bie 't groeëte publiek baeter bekindj as Leike, móst nao 't zekehoes veur 'n operatie ane meniscus. Wendy kocht 'm veur dees gelegenheid 'ne noewe pyjama. Thoes gekómme bleek de pyjama te werm, of te klein, of de kleur blauw beveel 'm neet? Dae waas in eder geval neet good en móst waere geruuldj. Dus ze stappe allebei oppe fiets trök nao Wieërt. Óngerweges vreugtj Leike of ze de pyjama waal heet mètgepaktj. "Jeh nein, dich zoojs det doon. 't Is toch eure pyjama of neet!" Toch waas 't Wendy die trök nao hoes is gefietstj, óm dae pyjama te gaon hole.



VOETPUNT

MEDISCH PEDICURE PRAKTIJK



Óm te speije

De bus mèt aojer minse reej in Rooj langs 'n hoes woeë de ooievaar waas gewaesj. Vól groepe haje heur babybord gezatte en oppe veurgróndj stóng 't sjoeënste bord: tweeë kabouters mèt 'ne paddestool en bolderker. Oppe bolderker de naam 'Speije'. Ein van die aojer minse zagt: "Weem numtj zien kiendje noe Speije? Det zagte wae vreuger tege kotse of euvergaeve."

Naovraag lieërdje det in det hoes Ilvy Mols woeëntj. Wae oet èll wete natuurlik det Ilvy lid is van de vrinjegroep SPIEJE. Det wete die aoj Roojer minse neet. 't Jungske hètj Sten en dae hooftj bekans noeëts te speije.



Wisj dj'r al..

- det Zjuul 'n bruistablet haaj gepaktj, ómdet ze zich neet fit veuldje;
- det ze verklaordje dae rómmel noeëts mieër te pakke, want "det óntplofdje gewuuen in miene móndj!"
- det ze vergaete waas det ze die tablet ieëst móst oplosse in water.



Dao zit 'n luchtje aan...

Thom en Romy haaje 'nne kleine gekrege, "laot mer wete as ich get kan doon hé", zagt Luuk tege de kersverse aojers. Thom haaj al drek 'n klusje klaor ligge veur Luuk: de geboortekaertjes rónjbringe in Hunsel. Dju Luuk, den most dich waal lang diene aom inhaoje!





LASERGRAVERE
mèt 2 vingers
inne naas?



RonsLaser
maaktj speciale
kadookes!

Gooj locht

Écht vervaelendj

De manne van 'de Vervaelers' wore good op stap gewaestj in Wieërt. Wie ze de speciaalbiertjes inne Brouwschuur op haje, ginge ze via de Oelemertj trök nao Èll. Thom Peeters haaj gein verveur, dus hae spróng bie emes achteróp de fiets.

Helaas sjadje hae de aafstandj verkieërdj in en ging flink op zien gezicht. 't Blood stroumdje net zoeë royaal as de tap de ganse daag haaj gedaon, dus det zaag d'r al drek hieël ernstig oet. Zoeë erg zelfs, det de zekewage waerdje gebeldj.

De ambulancebroeder waas in 'n gulle bui en booj aan, óm Thom nao hoes te bringe. "Woeë mós se haer?" "Ich woeën al mien ganse laeve in Èll", vertèldje Thom. "Deh, ich kóm oorspronkelik oet Hunsel." "Och," zeet Thom, "dao kóns dich ouch niks aan doon." Gae kóntj uch waal veurstèlle det t'r toen op eige houtje heives most.



Wisj dj'r al..

- det Prins Jeroen veurig jaor as ieëste de bus oetstapdje en ziene scepter op 't dashboard leet ligge;
- det vervolges de ganse Raod van 11 d'r naeve aaf leep, zónger 't op te merke;
- det Jeroen de bus nog net kost tegehaoje, anders haaj hae mèt leeg henj oppe sleuteloverdracht gestange.



Timmerbedrijf - Houthandel
W. STEUTEN BV

Grathemerweg 49B
 Kelpen-Oler
 0495-652178

www.steulentimmerbedrijf.nl

WEURDJE VAN AOD-PRINS JEROEN

Leef Moeërebuuk,

Ouch wae höbbe van 't Kwakelcomité de vraog gekrege óm 'n stökske te sjrieve wie det wae de vastelaovendj belaeftj höbbe.

Vanaaf 't moment det ich gevraagdj bèn tot 't hieringsjèlle op aswoonsdig waas 't geweldjig! Ein kort seizoen aafgeloupe jaor, mer aevegood mèt alles d'rop en d'raan.

Nao ein lang veurbereiding mèt 't gevolg ging 't op 6 januari los. Mèt flink get zenuwe stinge we in 't publiek totdet 't begós. Vanaaf det moment hoofdje we ós neet mieër stil te haoje.

't Waas bekindj: wae wore 't noewe prinsepaar van de Moeërebuuk!

Waat kwome d'r daonao völ verrassendje sjoëen reacties en momente. Hie aan kónse zeen det 't klein dörpke Èll 'n sjoëen gemeinsjap is, van gezellige en hel wirkendje minse. Dees minse zörge d'r veur det de vastelaovendj geveerdj kan waere en ouch daadwerkelijk geveerdj weurtj! Van de 80+ middig tot de recepties, van de bóntje aovendj tot 't verbranje van de scepter, eder activiteit waas genete. Leuk óm jónk en aod mèt te zeen doon! We höbbe veul polonaises geloupe totdet we pien kregre aan de veut, mer det haaje we d'r gaer veur euver. Wae wille ederein bedanke dae zich zoeë hel heet ingezatte. Daodoor waas 't veur ós ónvergaetelik! Wae zulle d'r nog lang mèt plezeer aan trök dinke.

Wae winse ós opvolgers net zoeveul lol en plezeer en doon gaer in de Raod van 11 mèt heur mèt.

Prins Jeroen, Prinses Claudia

De Kwakel



Op de foto zeen we drie aod-prinsesse, mer weem huurtj hie neet bie?

- A. Jeanne Corsten, des de enige zónger bril;
- B. Jean Bankers, die hètj neet Jeanne;
- C. Jeanne Camp, one-prince woman, heet geine ex-prins.

GOOJ VEURBEREIDING IS OUCH NEET ALLES

Ze haje 'n sjeke activiteit bedacht: Wie is de Mol, JWE-editie. De veurbereiding verleep vlotjes; de gekste opdracht waerdje bedacht, alle deilnummers kregre eine vraogeliest óm in te vulle en ouch de portofoons waerdje ruum 'n waek van te veure ingestoke.

Tiejes de activiteit waas de 2e opdracht boete. Daobie moste de deilnummers mèt d'èin d'anger communicere, dus Glenn deildje de porto's oet. Mer wie wirke die dinge eigelik? Hae probeerdje alle knupkes, mer de lómmele ginge neet aan. Tot Koen zich d'r mèt kwaam bemeuje en zaag: d'r zitj gaer geine accu in!



Inne betón gegote

Chris leet ein noew èrpelloeëds bouwe en dao kwaam eine betónvloer in. Óm dae slietvast te make, waerdje dae gevlienderdj. Det doon ze mèt rónjdreijendje machines en det mótt gebeure as de betón nog neet hel is. Wie ze klaar wore mèt aafvlindere, zatte ze zich op heur koelbox. Ze ote zich 'ne botterham en bewónjerdje tevreje 't resultaat. Net op det moment waas ouch Petra klaar mèt heur werk. Ze zaag die men zitte en reej hieël stoer op heure graasmeijer d'r langs aaf; herstikke vast in dae pasgestordje en fijn aafgewèkdje vloer!

Wisj dj'r al..

- det de sleuteleuverdracht 2024 georganiseerdj waerdje door Naer, Roggel en Heibloom;
- det 't volk achter de bar -netjes gezagt- neet zoeë good ónger de veut oet kost;
- det Anouk zich toen helop aafvroog of Hael ouch óngerdeil waas vanne gemeindje Leudal;
- det ze meindje de bar waerdje bemandj door de bewoeëners van Sint Joep.



De Kwakel



CV DE MOEREBUUK
Jaorgank 60

De wereldreiziger

Mèt ein groeëte groep vrullie de zón opzeuke veur 't jaarlikse vriendinneweekend, Malaga waas de bestömming! Bepaktj en bezaktj kwaam de groep midde inne nacht aan op 't vlegveld in Düsseldorf. Gae kintj 't uch veurstelle, 13 vrullie mèt hieël völ bagage. Al waeke weurdj d'r inne groepsapp gespartj euver 't inpaklietj, alles haje ze bie jich. Toch? Toch, Loïs Camp? 'As we van eine op aan kinne, is 't Loïs waal! Die is notabene net trök van 'n half jaor reize door Zuid-Amerika', huuere wae de meide nog dinke. Wie korter ze bie de check-in balie kwome, wie stiller Loïs waerdje. Ze haaj van alles bie jich, mer woeë heur ID waas, ze haaj gein idee!



11 VERSJILLE



Telefoon kwiet

De traditionele aod-prinsedaag stóng dit jaor in het teiken van 'trök inne tied'. Ederein most mèt de fiets kómme. Mer tege de tradities in woort d'r gereisdj mèt ein groeëte bus. Dit ómdet aod-prins Jeroen, mèt zien orde van 't Buske, ein van de organisatore waas. leëst nao museum 'Trök inne tied' in Heur, daonao nao 'Bie de Tied' in Kelpen en vervolges euver de Bösstraat langs de Bös en oeteindelik nao 't eindstation Bie Joeri. Dao kwaam ein van de reisleiders, aod-prins Erik (de Witte), d'r achter det t'r ziene telefoon kwiet waas. D'r woort boete ane frietwage gezócht, de busfirma, Bie de Tied en 't museum waerdje gebeldj, mer nöriges waas det dink. De Witte woort wie langer wie ónröstiger.

Ane bar hooldje Jack (de Sus) de telefoon oet zien tes. Dae haaj d'r inne bus gevónje op de Witte ziene stoel. Micky, altied in veur ein practical joke, eisdje drek dae gsm op en zagte tege Mariëlle, det die tege de Witte mos zègge det t'r mèt heure telefoon nog ins mos probere zien eige nummer te belle. Missjien zoj waal emes oppakke. De Witte trapdje d'r in en beldje, woeë det ederein biestong, nao zien eige nummer. Micky paktje op, zagte geine naam, mer vertèldje mèt ein staole gezicht en ein sterk Noord Afrikaans accent det t'r de telefoon ieërliek gevónje haaj en hum vanaaf noe as zien eigendom besjouwde. De Witte trocht nog witter wèg en 't zweijt brook hum oet.

Wie hae inne gate kreeg det de half bar plat laag van 't lache en Micky nog gein 2 maeter van hum aaf sting met ziene telefoon aan 't oeër kost t'r neet anges den mètlache en get vloke. Wie d'r ziene telefoon van Micky trökkreeg en hae Micky 'n kus vol oppe wang haaj gegaeve waas alles weer good. Volgendje kieër baeter op dien spulle lètte Witte, zeker as d'r aod-prinse inne buurt zeen!



Waat gebeurtj hie?

- A) Joost en Dane hóbbe de boeëk gebroke
(De oorzaak van die buukskes? Dae hóbbe ze inne rechterhandj!)
- B) Joost en Dane hóbbe d'r de boeëk van ol
- C) Ein Moeër heet ein buukske en ein...



Wisj dj'r al..

- det Joost hieël erg good is in Èngels
- det hae same mèt Maud op vakantie waas in Slovenië
- det hae besloot det 't waal zoeë netjes waas om foeëi te gaeve in 't restaurant
- det hae toen in zien bèste Èngels zagte: "That's good so!"



Koolen
De Echte Bakker

Wichterkal



De Kwakel

Dae vleger geit neet op!

Lou (5 jaar) ging mèt de familie Koolen op vakantie nao Spanje. Hae zaag toch waal op tege de vleegeis. Laura en Jochem vroge aan 'm woeë hae den bang veur waas. Zien antjwoord waas, det t'r 't toch waal spannendj vónj óm oet 't vleehtuug te springe. Lou meindje det de vleger neet aan de gróndj kwaam, mer det ederein oet 't vleehtuug mótt springe. Zoeëj waal 'n leuke optie zien, Lou!



Cadeau of Kato

Jolie (3 jaar) waas erg gecharmeerdj van baby Kato op de opvang en sprook heure wins oet: "Ich wil later ouch gaer ein Katootje!"

"Niene (4 jaar), hóbse ouch get veur vaderdag gemaaktj?" vreugtj Danique. Niene zeet tege papa Alex: "Jao! Zelf gekleurdje sokke... ich gaon 't tege nemes zègge!"



Duuk (8 jaar) vroeg aan Anouk: "Mama, haaj Ome Jeppie vreuger gein geldj?" Anouk zeet: "Dae waas neet zoëë good in spare nae, mer wiezoëë vreug se det?" "Ómdet dae 't hoes van oma Ankie en opa John heet gekrege en dich hóbse waal 'n eige hoes kinne koupe!"



Waterrat

'T is 24 november en 't zónke sjientj op z'n bèst. Oppe Antoniusstraat steit Don (2 jaar) te brulle langs de weeg. Is de komst van Sinterklaos desmiddig te spannendj? Waas hae neet braaf gewaestj dit jaor? Nae, niks van dit alles. Don heet groeët verdreet. De zon sjientj en hae wiltj zwumme, mer papa Steef wiltj 't badje neet opzette!

prinsheerlik aete

Dave (6 jaar) waas bie ome Pieter op bezoek en bleef mèt aete. Op 't menu sting kippepuuetjes en det waas ein geknoeëj, de trui waas d'r hieëlemaal vèttig van. Pieter vreugtj aan Dave: "Dave, hóbse op diene trui geknoeëtj?" Zónger te kieke antwoordje hae: "nae dae trui is gewuuen slecht gewasse".

Foute Formule

In de KVV-waek waerdje veur alle kinjer eine sportdaag geregeldj op 't voetbalveldj. Bram Boonen en Mike Benders haaje de taak óm ein stormbaan te regele. Ze gove aan det ze echt 'n mega stormbaan haaje van waal 19 maeter lank! Det kosdje ouch nog neet vól, dus top! dachte de hieëre. Wie die stormbaan waerdje geleverdj, veel die waal behuuerlijk tege. Die veel 9 maeter tege, óm precies ate zien. De jónges haaje neet good gelaeze mèt 't bestèlle, want de stormbaan heet de naam: Formule1 9 maeter.

Wisj dj'r al..

- det Mohamed oet groep 2 nao 'n anger sjoel ging en bie zien aafsied sjokelaatjes oetdeildje in de klas;
- det de juf ouch 'n sjokelaatje kreeg en dit bewaerdje veur bie de koffie;
- det daodoor 'n deil wichter 't sjokelaatje al ophaaj veurdet de juf doorhaaj det 't keesebonbons wore.



De Kwakel



EHBO veur klussers

Mitch waas get aan 't klusse in hoes wie hae d'r achter kwaam det t'r cement tekort haaj. Hae besloot óm buurman Cas te appe: "Höbs dich misjien nog get portlandcement in hoes?" Cas reageertj: "Ich höb paracetamol mer ouch Ibuprofen, of bèn ich te laat?" Hae haaj iets te vluchtig euver 't appje hear gelaeze.



Verkieërsborde zeen everal anges

Ein grupke jóng Ëller jónges ging mèt de auto nao Kroatië op vakantie. Ze haje zich al 3 daag netjes gedrage en ginge inne stad boeëdsjappe doon. Dao waas nog ein plekske vriej en dao zatte ze dus heure auto. Ze deeje de drankinkoup en anger boeëdsjappe, mer toen ze trökkwome waas d'r geine auto mieër op 't plekske. Drek nao de politie en toen bleek det die de auto haje wèggesleiptj. De auto stóng bove 'n brandjwaeraansloeting. Det haje ze kónne wete, want dao stóng ein verkieërsbord bie "Hie gein auto's parkere, want dao is 'n aansloeting van eine brandwaerput en dao wille wae in geval van noeëd altied aan kónne". Det haje ze neet zoeë begrepe, dus ze betaaldje € 90,00 en kregde de auto trök. Jurre Snijders zagt nog: "Ich höb zón bord gelieërdj oppe theorieles, mer ich wist 't neet mieër. In ós landj höbbe wae dees verkieërsborde neet mèt die óndudelikke tekste.



Gelaje



De batterie van heur horloge waas leeg en ze vónj 't mer gedoons óm dao ein noew in te laote zette. 'Dus,' zoeë bedacht Linda zich, 'ein gooj reje óm ein noewe horloge te koupe.' Ze zaag op Vinted ein sjoëen klökske en waas drek verkocht! Vinted, mójtj ge wete, is eine twieëdjehands winkel op 't internet. En gae veultj 'm al aankómme; wie die noew horloge bezörgdj waerdje, waas ouch dao de batterie van leeg!!! Wie ze dit verontwaardigd tege Berend verteldje, vroeg dae zich aaf: "Zooj se ouch eine noewe auto koupe as de tank leeg is?"

MART KESSELS
TRANSPORT
v.o.f.



Battery Low!



TT Demoritten Haler



Ëller minse levere 'n belangrieke biedrage aan de TT Haler. Neet allein weurtj 't verkieër in gooj bane geleidj, mer ze zörge d'r ouch veur det d'r in Haler geine dorst geleje hoeftj te waere. De organisatie is hie hieël blie mèt.

Wiltj gae ouch mètwirke aan det spektakel op **18-19-20 juli 2025** in Haler, meldj uch den aan as vriejwilliger. Det kóntj gae ouch as vereeniging doon, daomèt kóndjer den ouch nog get verdene veur eure vereenigingskas of veur ein ziespan?



Wisj dj'r al..

- det d'r neet allein Ëller vriejwilligers zeen, mer det d'r ouch ein heus Ëller ziespanteam besteit: Team Clerkx!
- det Peter Clerkx as bieriejer bie Ilse de Haas, 'n hieël knappe jóng blónj motorriedster, "in 't bakkie" mocht.
- det Peter zich daoróm zelf ein ziespan kocht en det Ruud vanne Sus bie Peter "in 't bakkie" maag?



Optocht 2024



Ómfietse

Al eine hieële tied is de weeg tösse Ëll en Leivere aafgeslote vanwege wèrkzaamhede. Len Corstjens woëntj mèt zien vriendin in Heytse, dus det is veur hum ein bekindj probleem. Mèt Ëll kirmis ging d'r aojerwits mèt de fiets nao Ëll op stap. Noe haaj emes 'm waal moge zègge det de fietspaad gewuuen te gebroeke waas.

Doeëdse stilte

De organisatie haaj d'r veur gekoze óm jónger minse 't verhaol te laote doon bie de bie-einkomst "Gluren bij de Buren". Zès plekke wore oetgekoze en ein daovan waas op 't kirkhof. Steef Maessen zoeëj dao 't verhaol vertèlle mèt oppe achtergróndj de pastorie en de aoj pastorie, 't hoes van Adams. Steef haaj de tekst aangereiktj gekrege van de organisatie. Hae zoeëj 't in zien eige weurd vertèlle. Hae vertèldje enthousiast en goof dudelikke oetlèk. "Mer hiej op 't kirkhof waere de lèste jaore grave opgeruumdj, ómdet de termien is verstreke. En det zeen d'r mieër den det d'r noew grave waere gevraagdj. 'T kirkbestuur heet d'r gein probleem mèt det 't aanbod groeëter is den de vraag." De minse wiste ouch neet wie ze det probleem móste aanpakke of oplosse.



Glure bij de bure

"Dao kónne misjien waal 300 minse op aaf kómme." "Jao, mer misjien ouch mer 100." Normaal vraoge wae gein entree, mer 'n vriewillige biedrage. "Wae gaon mèt ein collectesjaol rón dj en wae gaon d'r vanoet det wae daomèt de koste hóbbe gedèktj. Inne collectesjaol loge vól dieke muntje en ouch breefkes van € 5,00 en 'n paar van € 10,00. Minse die gein geldj bie zich haje koste mèt ein QR-code betale. Wie de ieëste daovan gebroektj haaj gemaaktj, goof 't mobieltje bij nummer tweeë (en bij alle angere moderne betalers) aan: "Er is al een bedrag gestort". Bleek det de QR-code fout waas ingestèldj. Daomèt zeen ze vól kleine biedrages misgeloupe.

Wisj dj'r al..

- det Kato 'ne alpaca knuffel heet
- det Nicole 't versjil neet kintj tösse eine alpaca en eine lama
- det ze zich aafvroog of eine lama den ouch eine bultj heet?



De Kwakel

CV DE MOEREBUUK
Jaorgank 60

Woeërom moeilik doon?

Nao 'ne lange daag wirke zitte de medewèrkers van café de Prairie aan 't beer, as Marlies binnekömtj. Petra sjödtj heur 'n glaeske wien in en wiltj weer gaon zitte, mer Marlies zuut luppetstift op 't glaas en zeet dao get van. Petra bekietj 't glaas "woeë den?" "Hie aan deze kantj", wiestj Marlies. Petra kiekjtj nog ins tegooi en mótt Marlies geliek gaeve. De oplossing is hieël eenvoudig. Ze dreitj 't glaas 'ne kwartslaag, mètt 't advies: "Drink mer aan de angere kantj!"



In spiegelbieëldj gedachtj

De Witte vanne sjilder haaj de spiegel vanne auto kepot; d'r zoot sjaai aan de boetekantj. Hae bestèldje ein noew spiegelkepke bie de autograasj, mer dao haje ze neet de gooj kleur. Hae vroog aan Thom Peeters of hae 't kepke inne gooj kleur kótt spuite. Det woor veur Thom gein probleem; zoeë gezagd, zoeë gedaon. Staags d'r nao kreeg Thom ein appje van Erik: "Thom, hóbse toevallig nog get lak euver? Ich hób de linkerspiegel bestèldj, mer 't is toch echt de rechterspiegel dae sjaai heet..."



Klimaatverangeringe treffe ÈLL ouch

Hóbse ein fieëstje geplandj, moog se det haoje bie dien tante (Rianne Goldenbeld) inne tuin. Den dinkse ich hób euveral aan gedacht en mètt alles raekening gehaoje. Kumtj d'r mich toch 'nne bak rèngel oet de locht valle. Neet normaal! Oppe Sebastiaanstraot en oppe Magnoliastraot water toet euver de trottoir. Mer gelökkig waas 't fieëst 600 maeter wiejer. Ouch vól water mer 'n geweldjig fieëst. Bo en Cas en hieël vól anger hóbbe echt genote.



Kunnekoel weurtj opgegrave

Ellske heet gehuurdj det d'r forse maotregale waere geplandj in verbandj mètt de klimaatsverangeringe. Vreuger waerdje Kunnekoel gedemptj en koste 'n aantal grave in die buurt toe gegoeëdj waere. Mer noe 't zoeë vól raengeltj de lèste jaore mótte d'r veur de hoeëg water probleme oplossinge waere gezócht. Op de iesbaan bie 't speulveldje kómme gein hoeze, mer dao weurtj (oppernoew) ein deepe koel gegrave. Daodoor zaktj 't gróndjwater inne kroepuumdjes van de hoeze van Hoverwei en Kunnebeemd. As 't lang vruustj en dao steit ies op, kónne de kinjer dao sjaatse; Ton Gerris bleeftj iesmeister. As 't neet vruustj maag dao waere gevèstj op paoling en baars. Inne zomer kan dao waere gezwómme of misjien geuftj Hub van Luute duikles ane seniore.

De graaf van de Kampstraot nao de Bösstraot weurtj deeper en breijer gemaaktj. Den kan dao mieër water in en det weurtj aafgeveurdj nao de Tungelse beek. De zandj dae vriekumtj weurtj op 't landj van Sjaokes verspreidj. Den hove de bulgare zich neet mieër zoeë deep te bukke as ze courgettes mótte aafdoon.

Ellske wachtj aaf, mer hèttj de zake zeker in de gate.



Oplossing 11 versjille

1 Schmilkin Jesper - 2 Knoup op sjuower - 3 Kraag Jesper - 4 Ongersjeijng óm nek
Pieter - 5 Tenj van Pieter - 6 Viegskene ane plesón - 7 Streep op jeske van Chris - 8 Petje Chris - 9 Smiley Jeske Chris - 10
Bloom op jas Jesper - 11 Kleur heudje op achtergróndj



Jeugdprins Koen & Jeugdprinses Miek

Ich bèn Jeugdprins Koen de ièerste,
zoon van Chris en Petra Breukers, en good in fièeste.
't Zal pap en mam zeker gaon bevallen,
nao deze vastelaovendj kan ich keigoed plat kalle.

17 februari 2013 is de daag det ich gebore bèn,
noe nog ein bietje gruje zoeëdet ich baeter bie de pedale kin.
Saame mèt mien zusje Janne is 't alied gezellig in hoes,
Jao, de boorderie aan de Hoeëgstraot, des echt mien thoes.

Mien hobbys zeen voetbal, skieje en muziek,
mer mèt dees daag veurop door 't Moeërelandj, det is pas sjiek.
Bie òs tege-euver woeëntj Tren, dao gaon ich veul mit crosse
mer mèt dees daag zal d'r as miene adjudant keihel mèthosse.

Live blaasmuziek huuertj d'r bie mèt mich as Prins,
later zelf mètspeule bie de kapel is miene groeëte wins.
Opa en pap ginge mich al veur ónger 't motto van èrpel, bolle en
graan,
mer hey, hey, hey....dit jaor laup ich mèt die moeër veuraan!

Mit de vastelaovesgene zijt 't dus waal good, want wae hóbbe allebei écht moeëreblood.
Prinse ervaring zuuse bie ós geliek, ós families zeen vanaaf vandaag 3 generaties aan Prinse riek.

Van 't Meuleveldj tot aan de Fuus, wètse deze vastelaovendj echt neet waat se zuus!
Daoróm regere wae deze carnaval, in de orde van 't Prinsebal!

En det allemaol ónger ós motto:

***"Drie daag fièeste, wae vleege hieëlemaal oet de bocht, van vastelaovendj
kriege wae noeëts genógt, ALAAF!"***





Weurdje van de redactie.

Wae höbbe ós aafgevraagd of we uch dit jaor weer ein good gevöldje Kwakel zoeëje kónne oetbringe. Gebeurtj d'r waal genógt in 't dörp woëe wae euver kónne sjriev? Vinje die verhaole de weeg waal nao ós? Gelökkig waas 't op ós ieëste vergadering drek dudelik, dao hove wae ós gein zörg óm te make. Gae höbtj ós weer good weite te vinje; inne kroeg, via de app, via de QR-code oppe poster en via de mail. En asse dich noe aafvreugs: 'Wie is dét verhaol euver mich noe weer inne Kwakel belandj, det höb ich écht geine vertèldj!', vergaet den neet det Ellske gooj oeëre heet. Waat ós uch dit jaor weer is opgevalle, is det d'r bepaoldje minse hieël dèk ein hoofdrol speule in de verhaole die bie ós binnekómme. Wae zeen de flauwste neet en höbbe den uch 'n paar hoofdleveranciers van Kwakel-verhàölkes gespaardj. Det is gaer gedaon ;).

Wae höbbe weer genote van 't oetbringe van dees editie vanne Kwakel. Zoeëlang d'r in 't dörp zoeëvöl vermakeliks gebeurtj, blieve wae mèt alle plezeer veur uch sjriev. Op ein hieël sjoen vastelaovesseizoen en vól laes-en-lach plezeer!

De redactie,
Anouk, Bo, Bram, Jos, Lieke, Nicol en Pleun

21 Joy Nagelstudio


AT Huidzorg

**"Spraa kmakende logopedie bij
Logopediepraktijk Eva Strous"**

Garage Heemels

Van den Eertwegh

Clerkx Eierhandel



De Kwakel is ein oetgave van 't kwakelcomité